

編號 1 號

【生趣个童年】黃美貞原作

還細時節，細人仔無電子產品做得搞；毋過，屋簷下、杌仔樹下、伯公下、大圳溝該、竹林肚，做下都係佢兜个遊樂園。

佢兜四姊妹，還過鄰舍个細人伴仔，輒常湊等份家啦飯仔、搞紙擲仔¹、搞園人尋等等，係堵著毋使讀書个下晝頭，定著愛搞到斷烏，等到大人擎等竹修仔來尋細人仔，大家看著毋修勢²也，正溜瀉。

好天好時，佢兜乜好在圳溝肚覓蜆仔。有一擺，沙鼻个老弟喋喋滾，同大家打賭講佢捉得著細蝦公仔，上屋个阿賢好擲擲仔應：「該愛仰般賭？」老弟誚難佢：「你係捉到比佢較多，暗晡夜佢就請你食夜。」阿賢堪毋得人翕³，應講：「好，無問題！」該下晝，佢兜先攔水窟，想撈蝦公餵到水窟肚，毋過，細蝦公仔哪有恁該捉，兩下半仔蝦公就躍走哩，佢兜試著無意思，早就走淨淨。無想著佢兩儕定著愛比到有輸贏，目珠眨都毋眨，減到一

身溶潦、局局糟糟合泥了了，水窟肚就單淨攔著兩三尾細魚仔定定，等到暗摸胥疏也，佢兜正無結無煞、遽遽轉屋。管佢麼人輸贏！係還毋轉屋，毋單淨無飯好食，皮還愛弓絀啊正做得咧！

還有一擺，下晝頭當翕熱，佢兜恁多姊妹在屋側角搞園人尋。老弟係搞頭王，滿哪仔都尋得著來園，搞幾下輪都搞毋得煞棚。無想著，坐在屋簷下个阿婆大聲喊講：「遽遽轉來啊！莫在該頭牛眼樹下搞，該位盡多草鞋搭⁴哦！」頭擺个細人仔輒常打赤腳搞到毋知頭天，樂線樂線个佢兜，無撈阿婆个話聽入耳。結果，做鬼捉人个老妹忽然間看著該生到烏疏疏、有十過公分長个弄毛蟲，對等佢趕過來，佢嚇到尾瀉屎、走都走毋掣，嗶「哇！」聲仔嗽出來！嶄然好搞个老弟，興蹀蹀仔行兼想愛逐該尾草鞋搭，阿婆閱悴悴仔咄講：「你係畀趕到圓身項，該就貓拖糞耙啊——難敲爪哦！」

「良言莫嫌少，朋友莫嫌多。」還細時節，跔等同學伴仔、鄰舍个細人伴仔弛崗打陣共下搞，滿哪仔都係佢兜共下行過个腳跡、看過个景色、搞過个生趣事，乜係佢兜盡懷念个童年。該兜生趣个回憶撈畫面，永久都會留在吾个腦膈肚。

¹ 紙擲仔：音 zii` biag e`；紙牌，指孩童時期玩的圓形紙牌，圖案多為卡通人物或電視、電影劇中人物。

² 毋修勢：音 m` cam se；形勢不好、情況對自己不利。

³ 翕：音 hib`；此指以言語威嚇或挑釁。

⁴ 草鞋搭：音 co` hai` dab；大灰枯葉蛾的幼蟲。

編號 2 號

【敬祖公】李雪菱原作

這擺五月節，阿爸帶偌兜轉伙房肚去敬祖公，有當多个牲儀排在神桌項，算算啊有五、六十戶人家。叔公講：「係講過年，又會還較多哦，歇在外地个都會轉來，有七、八十戶恁多。」輪著點香个阿亮叔比手畫腳个安排等，分大家个牲儀都做得排好勢。除忒三牲以外，偌兜中片伙房个子孫，還會另外準備五碗炒好个齋菜，阿婆同偌兜講，該係因為公太食齋。阿公講：「這係五燥五溼。」偌看有柿花、牛眼乾、麻糬、米糬、冬瓜糖、番豆糖，還有炒好个香菇、木耳、金針、筍乾、冬粉這兜，心肝肚想：「到底係公太愛食？還係偌兜好食？」

香點好，愛等斟酒，大家開始打嘴鼓，該片伯公講起頭擺歇在伙房，伙房分上片、中片、下片，敬祖公个時節有當多人。時代變咗，伙房歇毋下，後生人徙出去落戶，這下淨伸三、四十戶仔，看起來有兜仔冷落，故所，過年過節大家愛擲工轉來，恁樣正會鬧棚。

這片細阿叔講：「頭擺，下片阿木叔豬欄脣野生一頭杌仔，阿葉哥會帶偌兜歸陣細啞仔去摘來食，係分阿木叔姆看著，就會

拿祛把來逐偌兜，害偌兜都走到死無命，毋知愛去哪位園正好，到這下發夢著，都還會著驚咧！」大家聽到哈哈大笑，你一句、偌一句，笑聲滿廳下，實在有鬧熱。

叔婆、伯姆佢兜企在神桌脣，指等毋知哪家人个雞仔，緊說講，畜到當靚、縹來又澄線！細叔姆分大家看到面紅紅，又盡歡喜个講係厥个。叔婆幹頭同阿姊講：「你兜旨嫁人个細妹仔來看一下，左魚、右肉、雞中央，愛記得！莫排差咗，正毋會分人講偌兜無教著。」

另外一片，細後生仔企共下，手頂拿等手機仔，滑來滑去，不時耳側側仔細聲講話、不時又交流影片愛仰仔下載；還有人戴等耳機仔搖來搖去，一看就知係在該聽熱門音樂。外背禾埕項一大陣細嗶仔跔等阿弟牯走來走去、逐上逐下，毋知係在該搞麼个？分人看無哦！

阿亮叔喊：「斟酒、斟酒，銀紙愛先散便。」仰恁遽呢？嘴鼓都還旨打煞，大家又相賽去各家斟酒，無閒泊杈、左手交右手。三道酒過後、燒銀紙、砰紙炮仔¹。

鬧鬧熱熱个伙房，有一籬鉢个生趣事，永久都講毋會煞，該跔等酒香散出來、隨等紙炮仔聲傳出來个，係幸福个香、係幸福个聲！

¹ 砰紙炮仔：音 bong zii` pau e`；燃放鞭炮。